

E rima rā te roa o ia kura. Ko te ahiahi o te Rātapu te wā whakaeke, ā, ka hiki te hui i te ata o te Paraire o muri mai.

Kua tū kē te tuatahi me te tuarua o ngā kura mō tēnei tau. Ko te tuatoru, ka tū ki te marae o Kirikiriroa atu i te 22 ki te 27 o Mahuru.

● *E wātea ana ēnei kura ki a wai?*

Ko te hunga e tino pīrangī ana te Taura Whiri kia whakauru mai ki ēnei kura, ko ērā e whakaako ana i ngā kura tuatahi me ngā kura tuarua o te motu, ā, ko te reo Māori tētahi o ngā reo kawē i ngā kaupapa o te karaehe. Mēnā ko te reo Māori anake te reo whakaako, ko te painga atu tēnā.

E hiahia ana te Taura Whiri kia mātua haramai tēnei hunga, i te mea mai anō, koinā tonu te tino kaupapa o ēnei kura, he whakapakari i te reo o ngā kaiwhakaako e waiho ana mā rātou e whāngai atu te reo Māori ki ā tātou tamariki. Kei te mōhio hoki tātou ko ngā kura reo Māori tētahi o ngā tino huarahi e pūmau ai te reo Māori, ā, e tika ana kia tautokohia atu rātou.

E wātea ana anō hoki ēnei kura ki te hunga whānui e minamina ana kia pakari ake tō rātou matatau ki te reo Māori. Heoi anō, i te mea ko te reo Māori anake e kōrerohia ana i ēnei kura a Te Taura Whiri, me mōhio anō te tangata pīrangī haramai ki te whakaatu i ōna hiahia katoa ki te reo Māori, mai i te tīmatanga o te hui tae noa ki te wā e hoki atu ai tēnā ki tōna, tēnā ki tōna.

● *E hia te utu whakauru mai?*

Karekau ana he utu ki ngā kaiwhakaako kura tuatahi, kura tuarua. E whakaae ana te Tāhuhu o te Mātauranga he “kaupapa whakapakari kaiwhakaako” tēnei, me te homai anō i te pūtea e ea ai ngā whakapaunga pūtea ki te noho mai a tēnei hunga. Engari anō te hunga whānui, (tae atu ki ngā kaiwhakaako e mahi ana i wāhi kē), kotahi rau tāra (\$100) te utu whakauru kua whakatauhia mō tēnei hunga, hei āwhina noa i te kaupapa.

● *Me pēhea te tangata e whakauru mai ai ki ngā kura?*

Me whakakī mai te pukatono (*kei te whārangi whakamutunga o tēnei mātārere*), ka tuku mai ai ki

te Taura Whiri. Me tae mai tēnei pukatono i mua mai i te hui, arā, kia rua wiki, neke atu, te tōmua mai, kia pai ai ngā whakariterite a tēnei pito.

Nā reira mō te hui ka tū ki Kirikiriroa, e inoi ana mātou kia tae mai he kōrero i mua i te 9 o Mahuru.

● *He aha ngā momo mahi ka whāia i ēnei kura?*

Anei ngā kaupapa matua ka āta tirohia i ēnei kura. Ko te wawata, ka paku hōhonu ake te titiro a te tangata, te mōhio rānei ōna ki ēnei āhuatanga reo Māori i tana noho mai ki ēnei wāhanga o te kura.

- Ngā Kīwaha me ngā Kīrehu (hei tauira, ko ēnei e whai ake nei: “*kua hē ngā rā* o Mea”, “*hei a koe mō te rūkahu*”, “*kua puku te rae* o Mea”, “*kotahi atu* ki te awa”)

- Ngā Whakataukī, ngā Whakatauākī me ngā Pepeha

- Te Whakatakoto Tika i te Kupu (hei tauira, ko: te whakatika hapa, te whakamahi kupu whakakāhore, te whakamatara kōrero whīwhiwhi, te hoatu kupu tika ki te wāhi tika)

- Te Whakamāori, Whakapākehā Kōrero

- Te Aroā Kōrero (arā, te kimi mai i te tino tikanga o ētahi kōrero kua tuhia ki te reo Māori.)

● *Ka pēhea te āhua o ngā whakaakoranga?*

Ka wehewehe haerehia te hunga whakauru mai kia ono, kia whitu rānei ngā rōpū, kia āhua tekau ai ngā tāngata ki tēnā rōpū, ki tēnā rōpū. Ka pēnei anō te tokomaha o ngā mātanga reo Māori ka inoia atu e te Taura Whiri kia noho mai hei kaiwhakaako i ēnei kura. Ka riro mā te mātanga kotahi e whakaako te kaupapa kotahi (mai i ērā kua whakaatuhia i runga ake nei). Ko tā ngā “akonga” he huri haere, kia tareka atu ai rātou ki ngā kaiwhakaako katoa, ki ngā kaupapa katoa. E rua hāora te roa o te nuinga o ngā wā whakaako, ā, ka noho atu ngā rōpū ki te kaupapa kotahi mō te whā hāora, me kī mō te katoa o te ata, o te ahiahi rānei.